

PELO SINAL

Santa Cruz ra'angaba resé, oré pysyrô iepé, Tupã oré iar, oré amotare'yimba suí. Tuba, Ta'gra, *Espírito Santo* rera pupé. *Amém, Jesus.*

PAI NOSSO

Oré rub, ybakype tekoar, i moetepyramo nde rera t'oikó. T'our nde *Reino*. T'onhe-monhang nde remimotara ybype, ybakype i nhemonhanga iabé. Oré rembi'u, 'ara iabi'ôndúara, eime'eng kori orébe. Nde nhyrô oré angaípaba resé orébe, oré rerekomemũsara supé oré nhyrô iabé. Oré mo'arukar umê iepé *tentação* pupé, oré pysyrôte iepé mba'eaíba suí. *Amém, Jesus.*

AVE MARIA

Ave Maria, *graça* resé tynysemba'e, nde irũnamo iandé iara rekóu. I mombe'ukatupyramo ereikó kunhã suí. I mombe'ukatupyra bé nde membyra *Jesus*. *Santa Maria*, Tupã sy, etupãmongetá oré i angaípaba'e resé ko'yr, irã oré iekyî oré rumbéno. *Amém, Jesus.*

SALVE RAINHA

Salve Rainha, moraûsubara sy, tekobé, se'êba'e, oré ierobiasaba, *salve*. Ndebe orosapukapukai, i pe'apyramo, *Eva* membyramo. Ndebe oronheangerur, oré poasemamo, oroíasegûabo ikó ybytygûaia iasegûaba pupé. Ene'ĩ, oré resé ieruresar, eboũ nde resaporaûsubara erobak oré koty. A'e *Jesus*, i mombe'ukatupyra, nde membyra, ikó iepé'asagûera syk'iré, esepiakukar orébe. Nherane'ym, moraûsuberekosar, se'êba'e, *Virgem Maria*. Etupãmongetá oré resé, *Santa Maria*, Tupã sy, t'oré angaturãne *Cristo* remienôigûera resé, oré iekosubagûama ri. *Amém, Jesus.*

CREDO DOS APÓSTOLOS

Arobîar Tupã-Tuba opakatu mba'e tetiruã monhanga e'ikatuba'e, ybaka, yby abé monhangara. Arobîar *Jesus Cristo* abé, ta'gra oíepeba'e, asé iara, *Espírito Santo* i monhangápe pitangamo onhemonhangyba'epûera. A'eba'e o'ar *Maria* abá bykagûere'yma suí. *Pôncio Pilatos* morubixabamo sekóreme, serekomemũãbyramo sekóu, ybyraioasaba resé i moíarypyramo sekóu, i iukapyramo, i tymymbyramo. Ogûeiyb yby apyterype. 'Ara mosapyra pupé, omanôba'epûera suí sekobeiebyri. Oíeupir ybakype. Tupã-Tuba opakatu mba'e tetiruã monhanga e'ikatuba'e 'ekatuaba koty seni. A'e suí turi oikobeba'e, omanôba'epûera pabẽ rekomonhangane. Arobîar *Espírito Santo*. Arobîar *Santa Igreja Católica*. Arobîar *Santos* rekokatu iemoia'oia'oka. Arobîar tekoangaípaba resé morupé Tupã nhyrô. Arobîar asé rekobeiebyraûama. Arobîar tekobé opaba'erame'yma. *Amém, Jesus.*